



Resolución da Dirección Xeral de Educación, Formación Profesional e Innovación Educativa do 26 de maio de 2020 sobre o restablecemento do procedemento do proceso de acreditación de competencias profesionais adquiridas a través da experiencia laboral, na comunidade autónoma de Galicia, en determinadas unidades de competencia do catálogo nacional de cualificacións profesionais (código de procedemento ED517B)

Por acordo do Consello da Xunta de Galicia do 12 de marzo de 2020 adoptáronse medidas preventivas en materia de saúde pública na Comunidade Autónoma de Galicia, que foron seguidas da declaración, por acordo do Consello da Xunta do 13 de marzo de 2020, da situación de emerxencia sanitaria no territorio da Comunidade Autónoma de Galicia e de activación do Plan territorial de emerxencias de Galicia (Platerga) no seu nivel IG (emerxencia de interese galego), como consecuencia da evolución da epidemia do coronavirus COVID-19.

Posteriormente, pola Resolución do 30 de marzo de 2020, da Secretaría Xeral Técnica da Consellería de Presidencia, Administracións Públicas e Xustiza, mantense a vixencia das medidas preventivas adoptadas no ámbito da Comunidade Autónoma de Galicia polo Cecop con base no acordo do Consello da Xunta de Galicia do 12 de marzo, mentres que estea vixente a declaración do estado de alarma efectuada polo Goberno do Estado e a situación de emerxencia sanitaria declarada por acordo do Consello da Xunta de Galicia do 13 de marzo de 2020

O Real decreto 463/2020, do 14 de marzo, polo que se declara o estado de alarma para a xestión da situación de crise sanitaria ocasionada polo COVID-19, establece na súa disposición adicional terceira “suspéndense termos e interrómpense os prazos para a tramitación dos procedementos das entidades do sector público. O cómputo dos prazos renovarase no momento en que perda vixencia o presente real decreto ou, no seu caso, as prórrogas do mesmo”.

O Real decreto 465/2020, do 17 de marzo, modificou o apartado 4 desta disposición adicional terceira, coa redacción seguinte: “sen prexuízo do disposto nos apartados anteriores, desde a entrada en vigor do presente real decreto, as entidades do sector público poderán acordar motivadamente a continuación daqueles procedementos administrativos que veñan referidos a situacións estreitamente vinculadas aos feitos xustificativos do estado de alarma, ou que sexan indispensables para a protección do interese xeral ou para o funcionamento básico dos servizos”.

O Real decreto 537/2020, do 22 de maio, polo que se prorroga o estado de alarma declarado polo Real decreto 463/2020, do 14 de marzo, polo que se declara o estado de alarma para a xestión da situación de crise sanitaria ocasionada polo COVID-19, establece no artigo 7 a flexibilización das medidas no ámbito educativo non universitario no suposto de acordarse a progresión á fase II ou posterior nunha determinada unidade territorial.





A Orde SND/440/2020, do 23 de maio, pola que se modifican diversas ordes para unha mellor xestión da crise sanitaria ocasionada polo COVID-19 en aplicación do Plan para a transición hacia unha nova normalidade, no punto nove do artigo quinto modifica o anexo da Orde SND/414/2020 incluíndo a Comunidade Autónoma de Galicia dentro das unidades territoriais ás que é de aplicación a fase 2 do Plan para a transición hacia unha nova normalidade.

Publicada a Resolución, do 22 de maio de 2020, da Consellería de Educación, Universidade e Formación Profesional pola que se reinicia a actividade lectiva presencial no curso 2019-2020, se determinan as instrucións para o que resta do presente curso e se adoptan medidas de prevención e hixiene para a reapertura parcial nos centros de ensino non universitario dependentes da consellería.

De conformidade co recollido na disposición derradeira primeira da Orde do 29 de novembro de 2019 pola que se convoca o proceso de acreditación de competencias profesionais adquiridas a través da experiencia laboral, na Comunidade Autónoma de Galicia, en determinadas unidades de competencia do Catálogo nacional de cualificacións profesionais (código de procedemento ED517B), autorízase a Dirección Xeral de Educación, Formación Profesional e Innovación Educativa para adoptar as medidas precisas para a execución desta orde.

En atención ao exposto e tendo en conta a Orde do 29 de novembro de 2019 pola que se convoca o proceso de acreditación de competencias profesionais adquiridas a través da experiencia laboral, na Comunidade Autónoma de Galicia, en determinadas unidades de competencia do Catálogo nacional de cualificacións profesionais (código de procedemento ED517B), e coa finalidade de que as persoas inscritas neste procedemento que certifiquen as súas competencias profesionais poidan dar continuidade ao seu itinerario formativo e, na súa virtude, esta dirección xeral

DISPÓN

1.- Obxecto e ámbito de aplicación

Esta resolución ten por obxecto establecer as novas datas para continuar co desenvolvemento do procedemento de acreditación de competencias profesionais adquiridas a través da experiencia laboral, na Comunidade Autónoma de Galicia, en determinadas unidades de competencia do Catálogo nacional de cualificacións profesionais (código de procedemento ED517B) convocado mediante a Orde do 29 de novembro de 2019 (DOG do 12 de decembro)

2.- Publicación das listaxes provisionais





a) As listaxes provisionais de persoas admitidas e excluídas para cada unidade de competencia publicaranse, con indicación da causa de exclusión, a partir do 26 de maio no portal educativo da Dirección Xeral de Educación, Formación Profesional e Innovación Educativa <http://www.edu.xunta.es/fp>, e terá efectos de notificación ás persoas interesadas.

b) As persoas aspirantes poderán presentar reclamación contra as listaxes provisionais, que se poderá xerar desde a aplicación informática de xestión do procedemento, no prazo de 7 días naturais, contados desde o día seguinte ao da súa publicación e deberá presentarse a través da plataforma <https://sede.xunta.gal/>. Para o caso de envío por correo á sede onde se xestiona a súa solicitude, este deberá ser certificado, co selo de correos no encabezamento da primeira folla do formulario para reflectir a data de entrada.

3.- Publicación das listaxes definitivas

a) As listaxes definitivas de persoas admitidas e excluídas para cada unidade de competencia publicaranse a partir do 11 de xuño, con indicación da causa de exclusión, no lugar indicado no apartado 2a) desta resolución.

b) Contra esta resolución poderase interpor recurso de alzada ante a conselleira de Educación, Universidade e Formación Profesional no prazo dun mes desde o día seguinte ao da publicación das listaxes definitivas, que se deberá presentar nos lugares sinalados no artigo 16 da Lei 30/2015, do 1 de outubro, do procedemento administrativo común das administracións públicas. O recurso de alzada poderá xerarse desde a aplicación informática de xestión do procedemento para a súa posterior presentación.

4.- Desenvolvemento da fase de asesoramento

a) A fase de asesoramento comezará ao día seguinte da publicación das listaxes definitivas de admitidos e excluídos e deberá estar rematada o día 21 de setembro de 2020.

b) O asesoramento será obrigatorio e realizarase, con carácter xeral, de forma telemática.

5.- Desenvolvemento da fase de avaliación

a) Esta fase comezará para cada persoa candidata ao remate da fase de asesoramento e deberá estar rematada o día 23 de outubro de 2020.

b) Realizarase, sempre que sexa posible, de forma telemática.





c) As persoas candidatas poderán presentar reclamación perante a comisión de avaliación no prazo de cinco días naturais contados desde o seguinte ao de comunicación do resultado da avaliación.

d) Contra a decisión da comisión de avaliación poderase interpor recurso de alzada ante a Consellería de Educación, Universidade e Formación Profesional, no prazo dun mes desde o día seguinte ao de comunicación da decisión da comisión de avaliación, segundo o establecido no artigo 16 da Lei 39/2015, do 1 de outubro, do procedemento administrativo común das administracións públicas.

6. Medidas de prevención

Durante o desenvolvemento deste procedemento respectaranse todas as medidas de prevención e hixiene recollidas na Resolución, do 22 de maio de 2020, da Consellería de Educación, Universidade e Formación Profesional pola que se reinicia a actividade lectiva presencial no curso 2019-2020, se determinan as instrucións para o que resta do presente curso e se adoptan medidas de prevención e hixiene para a reapertura parcial nos centros de ensino non universitario dependentes da consellería ou calquera outra medida establecida para os centros educativos.

Asinado dixitalmente en Santiago de Compostela

O director xeral de Educación, Formación Profesional e Innovación Educativa

